



REPUBLIKA E KOSOVËS
REPUBLIKA KOSOVA – REPUBLIC OF KOSOVO

GJYKATA THEMELORE PRISHTINE

Numri i lëndës: 2021:275358

Datë: 18.01.2024

Numri i dokumentit: 05207605

PPP.nr. 1598/2021

GJYKATA THEMELORE PRISHTINË – Departamenti i Përgjithshëm - Divizioni Civil, gjyqtari Ibrahim Maloku, me pjesëmarrjen e bashkëpunëtorit profesional Festim Zeqiri, në çështjen përbarimore të kreditorit: Komuna e Prishtinës, kundër debitorit: V.M me adresë rr..... , Lagjia Prishtinë, në çështjen juridike përbarimore për borxh në shumën prej 200.00 €, duke vendosur lidhur me prapësimin e ushtruar nga debitori kundër Urdhrit për lejimin e përbarimit P.nr.1514/2021, të datës 01.11.2021, të lejuar nga Përbaruesi Privat Valdrin Beka në Prishtinë, jashtë seance, me datë 18.01.2024, merr këtë:

A K T V E N D I M

- I. **HIDHET POSHTË** si pasafatshëm prapësimi i ushtruar nga debitori V.M nga Prishtina, i ushtruar me datë 30.11.2021 kundër urdhrit përbarimor P.nr.1514/2021, i datës 01.11.2021 i lejuar nga Përbaruesi Privat Valdrin Beka në Prishtinë.
- II. Mbetet në fuqi urdhëri përbarimor P.nr.1514/2021 i datës 01.11.2021 i lejuar nga Përbaruesi Privat Valdrin Beka në Prishtinë, deri në përmbushjen përfundimtare të detyrimit.

Arsyetim

Zyra përbarimore e përbaruesit privat Valdrin Beka në Prishtinë, duke vepruar në bazë të propozimit të kreditorit, mbi bazën e dokumentit përbarimor : Urdhëresës për pagesën e ndëshkimit me gjobë mandatore me numër 001264 e datës 18.12.2020 ka nxjerrë urdhërin përbarimor P.nr.1514/2021 të datës 01.11.2021 dhe ka detyruar debitorin që në afat prej 7 dite nga data e dorëzimit të urdhrit ti paguaj kreditorit shumën prej 200.00€ si dhe shpenzimet tjera të procedurës përbarimore dhe ky përbarim do të kryhet përmes bllokimit të llogarive bankare të debitorit, sekuestrimit të letrave me vlerë si dhe sekuestrimin dhe shitjen e sendeve të luajtshme apo të paluajtshme të cilat janë në pronësi të debitorit.

Kundër urdhërit për lejim të përbarimit, debitori me datë 30.11.2021 ka paraqitur prapësim duke i shprehur pretendimet si në të njëjtin.

Pas pranimit të lëndës dhe pas analizimit të shkresave të lëndës, gjykata gjeti se debitori ka lëshuar afatin ligjor për paraqitje të prapësimit, andaj gjykata pa u lëshuar në meritat e prapësimit vendosi që të njëjtin ta hedhë poshtë si të pasafatshëm.

Nga shkresat e lëndës respektivisht flete dërgesa e postës së Kosovës, rezulton se debitori me datë 22.11.2021 e ka pranuar propozimin për përmbarim dhe urdhërin për lejimin e të njëjtit, ndërsa në bazë të vulës së protokolluar nga përmbaruesi privat rezulton se pranë zyrës së përmbaruesit privat prapësimin e ka paraqitur me datë 30.11.2021, gjithashtu edhe prapësimi datën e përpilimit përmban datën 30.11.2021.

Në nenin 70 të LPP-së, është përcaktuar afati kohor për paraqitjen e prapësimit dhe atë: *“Prapësimi duhet t’i paraqitet organit përmbarues brenda shtatë (7) ditëve pas pranimit të vendimit përmbarues ose urdhrit përmbarues.”*. Ndërsa me nenin 17 lidhur me nenin 126 par.1 të LPK-së, parashihet se: *“Afatet llogariten me ditë, muaj dhe vite”*, ndërsa paragrafi 2 i këtij neni parasheh se: *“Në qofte se afati është caktuar me ditë, përjashtohet nga llogaritja dita në të cilën ka filluar ngjarja ose koha nga e cila duhet të filloj afati, kështu që për fillim të afatit merret dita e parë e ardhshme.”*

Pra duke pasur parasysh se debitori, propozimin për përmbarim e ka pranuar me datë 22.11.2021, në bazë të dispozitave ligjore, afati për paraqitje të prapësimit ka filluar të rrjedhë nga dita e nesërme pra prej datës 23.11.2021.

Në bazë të shkresave të lëndës gjykata ka vërtetuar faktin se debitori prapësimin e ka paraqitur me datë 30.11.2021, kjo rrethanë vërtetohet nga vula e protokollit të përmbaruesit por edhe në faqen e fundit të prapësimit nga vet debitori është konstatuar data e paraqitjes së prapësimit është data 30.11.2021. Nën këto rrethana gjykata gjeti se prej datës 23.11.2021 kur ka filluar të rrjedhë afati për paraqitjen e prapësimit e deri me datën 30.11.2021 kur është paraqitur prapësimi kanë kaluar 7 ditë, respektivisht prapësimi është paraqitur në ditën e 8 (tetë). Andaj meqenëse gjykata gjeti se prapësimi i debitorit është paraqitur jashtë afatit ligjor, nuk u lëshua fare në meritat dhe themelësinë e prapësimit dhe në bazë të nenit 73 paragrafi 3 i LPP-së, ku parashihet se *me vendim prapësimi mund të pranohet, refuzohet ose hidhet poshtë si i pa afatshëm, si jo komplet dhe i palejuar*, vendosi që prapësimin e debitorit ta hedhë poshtë si të paafatshëm dhe urdhëri përmbarimor të mbetet në fuqi deri në përmbushjen përfundimtare të detyrimit.

Nga sa u tha më lartë, u vendos si në dispozitiv të këtij aktvendimi.

GJYKATA THEMELORE NË PRISHTINË
Departamenti i Përgjithshëm – Divizioni Civil
PPP.nr.1598/2021, dt.18.01.2024

Gjyqtari,
Ibrahim Maloku

KËSHILLA JURIDIKE: Kundër këtij aktvendimi është e lejuar ankesa në afat prej 7 ditësh nga dita e pranimit të të njëjtit, përmes kësaj gjykate për Gjykatën e Apelit të Kosovës në Prishtinë.